

四庫全書

經部

欽定四庫全書

經部

陳氏春秋後傳卷五

詳校官監察御史_臣李陽樞

給事中_臣溫常綬覆勘

覆校官庶吉士_臣徐立綱

校對官主簿_臣汪日贊

謄錄監生_臣張鴻仁

欽定四庫全書

春秋後傳卷五

宋 陳傅良 撰

僖公

元年春王正月齊師宋師曹師次于聶北救邢

有公羊傳

救不言次言次無志於救也狄伐邢於是三歲矣桓公足以攘狄而宿師於聶北玩寇以待其弊邢潰奔師而後遷之是故凡救譏也言次甚譏之也

夏六月邢遷于夷儀

自遷不書

據文十三年邾遷于繹成六年晉遷于新田之類

有遷之者而後

書由莊公而下以中國遷中國書曰某人遷某罪遷之者也由僖公而下以外域遷中國書曰某遷于某罪遷者也以齊晉之伯也而狄伐邢邢遷於夷儀狄圍衛衛遷於帝丘雖外域之暴橫而桓文亦受其咎矣

齊師宋師曹師城邢

有公羊傳

此救邢之師也使之若再有事然志桓慢也狄伐邢

於是三歲桓公足以攘狄而宿師於聶北玩寇以待其弊邢潰而後遷之桓公見義不勇矣

秋七月戊辰夫人姜氏薨于夷齊人以歸

有楚人伐鄭

荆始書楚自是楚有事於諸侯皆稱人

八月公會齊侯宋公鄭伯曹伯邾人于榿九月公敗邾師于偃冬十月壬午公子友帥師敗莒師于鄆獲莒挈

有公
羊傳

獲非卿帥不書

據四宋華元獲樂呂但書華元獲莒
齊國書公孫夏但書國書之類

挈非卿也則何以書嘉季子也慶父弑君之賊也莒人納焉賂而後歸之魯於是敗其師獲挈而魯之內

難始定

十有二月丁巳夫人氏之喪至自齊

有公羊傳

二年春王正月城楚丘

有公羊穀梁傳

於是諸侯城楚丘而封衛則其以魯辭書之但曰城楚丘何不以累桓公也諸侯之義不得專封不以專封衛累桓公也以魯辭書之使之若諸侯同欲然上

無明天子下無方伯諸侯有滅亡者夫人而欲救存之則先王之澤天下之公義也序績莫如公齊桓存三亡國必若救衛庶幾於公矣是故衛不言滅廬於曹也不言遷齊侯使公子無虧帥車三百乘甲士三千人戍曹不言救春秋之辭約而不迫者善辭也

夏五月辛巳葬我小君哀姜虞師晉師滅下陽

有傳并公羊穀

梁傳

晉里克荀息也稱師何滅未嘗書大夫將也下陽號

邑也滅下陽而後滅虢則其但書滅下陽何以為晉人之罪徒滅其邑焉爾而虢自亡也

秋九月齊侯宋公江人黃人盟于貫冬十月不雨楚人侵鄭

三年春王正月不雨夏四月不雨

有傳

徐人取舒六月雨

秋齊侯宋公江人黃人會于陽穀冬公子友如齊涖盟

有公
羊傳楚人伐鄭

四年春王正月公會齊侯宋公陳侯衛侯鄭伯許男曹

伯侵蔡蔡潰

但言潰自潰也

昭二十九年鄆潰

伐潰伐者潰之也

成九年楚師伐

莒莒

苟亡矣自潰不足道也

僖十九年梁潰

苟滅之矣潰之

不足道也

宣十二年蕭潰襄二十九年舒鳩潰

晉伐廆咎如廆咎如潰

不書傳曰上失民也言不徒罪晉也此桓公侵蔡也

則其書潰何侵淺事也侵蔡而蔡潰焉爾薄齊之罪

也

遂伐楚

春秋舉重凡師再有事不悉書

據成六年晉欒書救鄭遂侵蔡但書救鄭

八年晉欒書侵蔡遂侵楚侵沈但書侵蔡之類

苟悉書也則以遂言之兵事

言遂必關天下之大故也自入春秋楚浸強矣而不見於經敗蔡師以蔡侯獻舞歸聖人懼焉而諸夏之交兵非以定篡弑則修怨而已矣問不及楚也桓公始有志於夷夏之分於是伐楚而以侵蔡召諸侯書曰遂伐楚言志不在蔡也侵蔡遂伐楚以志齊桓之伯侵陳遂侵宋以志楚莊之伯足以見夷夏之盛衰

矣

次于陘夏許男新臣卒楚屈完來盟于師盟于召陵

書屈

完有穀
梁傳

凡次譏也此齊桓之師則其書次何用見桓之不戰而誅楚也桓公合九國之衆以討楚兵未有盛於此者也楚雖強足以一戰矣而臨楚不戰楚人為之誅使其大夫即盟於師桓公不欲臨楚盟屈完退而盟召陵不阻隘不以君違臣不以軍容亂國容一動而

三善得桓公不但以力服人矣春秋之褒貶辭不足以盡意而後見於文書曰次于陘楚屈完來盟于師盟于召陵斯其為文也美矣則從其恒辭書次可也

齊人執陳轅濤塗

有公羊傳

此齊侯也其稱齊人何貶也東遷之後諸侯始放春秋之治在諸侯而大夫不與北杏之後盟主始專春秋之治在盟主而諸侯不與治在諸侯貶人之是故於中丘會稱君伐宋稱人於郎戰稱君盟惡曹稱人

治在盟主貶人之是故於陘伐稱君於執濤塗稱人於溫會稱君於執衛侯稱人

秋及江人黃人伐陳八月公至自伐楚葬許穆公

凡諸侯卒於他國稱國

昭二十二年蔡侯襄二十六年許男

非國也則

但稱地

晉侯于扈宋公于曲棘

有諸侯之事焉則以其事卒之

曹伯于師杞伯于會

此其不言卒于師何以其在桓師猶在國

也於是葬之以侯禮加二等

穀梁內桓師也

冬十有二月公孫茲帥師會齊人宋人衛人鄭人許人

曹人侵陳

會侵未有書帥師者而公孫茲書帥師會救未有書
帥師者而公孫敖書帥師公子牙與弒子般公子慶
父謀弒閔公而茲與敖皆世為將是故謹志之曰子
友帥師敗莒師於鄆公孫茲帥師會侵陳公孫敖帥
師及諸侯之大夫救徐見三家之所從始也

五年春晉侯殺其世子申生

三傳同公羊穀
梁直稱君例

於是太子縊於新城則其斥殺何春秋之法苟有讒

而不見則其君之罪也是故申生以驪姬之譖自殺
宋世子痤以伊戾之譖自殺直稱君殺而已矣

杞伯姬來朝其子

穀梁有傳

夏公孫茲如牟公及齊侯宋公

陳侯衛侯鄭伯許男曹伯會王世子于首止

有傳

諸侯何以會王世子定世子也於是子帶有寵於惠
后世子危不得立桓公率天下之諸侯以會之世子
危不得立而為會以定之禮之變者也然則如之何
而可殊會世子而不以世子夷於諸侯不以世子夷

於諸侯所以定世子也桓公可謂善處父子之間矣

秋八月諸侯盟于首止

公羊前目
後凡例

會而後盟間有事書諸侯盟於某

事在襄十九年祝
柯二十五年重丘

非閒有事也亦書諸侯盟于某則有不盟者也此其
言諸侯則王世子不與盟也桓有諸侯之事三於洮
序王人於諸侯之上而同盟焉王人微者也雖同盟
而無嫌於葵丘亦序周公於諸侯之上而不敢同盟
焉天子之宰異於微者也盟於首止不但不同盟也

而帥諸侯以殊會世子以世子之尊非特天子之宰
比也桓公於是知節矣是故會有周人盟無周人書
會於某某日諸侯盟則齊桓之遜也會有周人盟有
周人書會於某但曰某日盟則晉厲之伉也春秋於
是予桓也事在成十七年柯陵
鄭伯逃歸不盟

國君而曰逃賤之也何賤乎鄭伯以其背夏盟也厥
貉之會麋子逃歸不書事在文十年厲之役鄭伯逃歸不

書

事在宣
十一年

蓋逃楚也必若鄭文公逃齊陳哀公逃晉

而後書所以示夷夏之辨嚴矣

楚人滅弦弦子奔黃

楚嘗有大夫屈完此鬪穀於菟也則其稱人何楚大
夫將恒稱人也

九月戊申朔日有食之冬晉人執虞公

有傳公羊曰
不與滅也

晉滅虞矣則其但書執何以為晉人之罪徒執其君
焉耳而虞自亡也是故滅者亡國之善辭也上下同

力也苟同力致滅自其君世子必詳所以滅之之罪
書曰楚子虔誘蔡侯般殺之于申楚公子弃疾帥師
圍蔡楚師滅蔡執蔡世子有以歸用之苟不同力執
其君而國從之矣則不詳所以滅之之罪書曰晉人
執虞公以為晉人徒執其君焉耳而虞自亡也

六年春王正月夏公會齊侯宋公陳侯衛侯曹伯伐鄭
圍新城

伐國不言圍邑

本穀梁例

此其言圍何以桓公合六國之

衆徒圍其邑焉耳自僖而下必圍國而後書邑不足書也

秋楚人圍許

此楚子也其稱人何楚君將恒稱人也

諸侯遂救許

於是蔡穆侯將許僖公以見楚子於武城許男面縛
銜璧大夫衰經士輿櫬此所以書救許也

冬公至自伐鄭

七年春齊人伐鄭夏小邾子來朝鄭殺其大夫申侯秋
七月公會齊侯宋公陳世子款鄭世子華盟于甯母曹
伯班卒公子友如齊冬葬曹昭公

八年春王正月公會王人齊侯宋公衛侯許男曹伯陳
世子款盟于洮

王人者何微者也序微者於諸侯之上雖同盟無譏
焉耳

鄭伯乞盟夏狄伐晉秋七月禘于太廟用致夫人有

此哀姜也曷不稱姜氏絕之也哀姜得罪於吾君而猶致於廟絕哀姜所以惡僖公也向曰夫人氏而不言姜見絕於其國之辭也今曰夫人而不言氏見絕於宗廟之辭也是故魯禘非禮也雖用之羣公之廟不書據禘于襄公禘于僖公之類有用之羣公之廟書者矣但曰有事譏不在用禘也事在昭十五年必禘於太廟致哀姜也而後書譏在用禘也

冬十有二月丁未天王崩

九年春王正月丁丑宋公御說卒

傳例非是說在章指

夏公會宰

周公齊侯宋子衛侯鄭伯許男曹伯于葵丘

天子之三公也桓嘗殊會王世子則其不殊會三公
何春秋是以予桓也春秋之予桓奈何桓之會有天
子之事三於洮序王人於諸侯之上而同盟焉於葵
丘亦序周公於諸侯之上而不敢同盟焉盟于首止
不但不同盟也而帥諸侯以會世子桓知節矣春秋
是以予桓也

秋七月乙酉伯姬卒九月戊辰諸侯盟于葵丘

此其言諸侯則宰周公不盟也

甲子晉侯嵬諸卒冬晉里克殺其君之子奚齊

有傳

遇弒雖未逾年稱君

據齊舍

此其稱君之子何獻公殺

申生絀重耳夷吾而立其嬖子晉之亂獻公為之也

是故奚齊不稱君而稱君之子

十年春王正月公如齊狄滅溫溫子奔衛晉里克弒其

君卓及其大夫荀息

有公羊傳

夏齊侯許男伐北戎晉殺其

大夫里克

公羊惠公之大夫也

討賊不言大夫其曰晉殺大夫里克何克猶在位也
克猶在位則是殺大夫耳在位獨里克乎督相宋莊
翬相魯桓前乎此矣於是里克殺以他故而後見焉
耳自宋萬而下弑君無討者凡賊再見猶夫人也雖
若晉里克衛甯喜殺以他故而後見書曰大夫則猶
夫人而已矣是故自里克迄春秋賊皆書氏族亂臣
賊子無以異於夫人矣通國以為賊吾從而志之以

為賊通國以為夫人我從而志之以為夫人我何加損焉實錄而已是經之大變也雖然有荀息在焉則猶有臣子也

杜自莊以上諸弑君者皆不書氏自閔以下諸弑君者皆書氏明時史之異同

非仲尼所成也非是

秋七月冬大雨雪

十有一年春晉殺其大夫平鄭父夏公及夫人姜氏會齊侯于陽穀秋八月大雩冬楚人伐黃

十有二年春王三月庚午日有食之夏楚人滅黃

滅不言伐此其書伐何病桓公也以陽穀之會貫之
盟徒以亡其國焉耳

秋七月冬十有二月丁丑陳侯杵臼卒

十有三年春狄侵衛夏四月葬陳宣公公會齊侯宋公
陳侯衛侯鄭伯許男曹伯于鹹秋九月大雩冬公子友
如齊

十有四年春諸侯城緣陵

有傳并穀梁傳

諸侯不序必前目而後凡也非前目而後凡也而不

序者散辭也

本穀梁及范甯

是故但曰諸侯者不繫之伯者

之辭也但曰大夫者不繫之君之辭也

梁

夏六月季姬及鄆子過于防使鄆子來朝

朝未有言使者則其曰季姬使鄆子來朝何惡魯而賤鄆子也於是季姬來寧公以鄆子之不來朝也怒止之遂遇於防使朝焉魯為已汰鄆為已卑矣於婦人乎何譏惡魯而賤鄆子也

秋八月辛卯沙鹿崩

有公羊傳

狄侵鄭冬蔡侯貜卒

十有五年春王正月公如齊楚人伐徐三月公會齊侯
宋公陳侯衛侯鄭伯許男曹伯盟于牡丘遂次于匡
救不言次言次無志於救也楚伐徐桓公合七國之
衆以救之而使大夫將有諸侯在而大夫將於是始
桓公為之也則桓志荒矣而卒不競於楚是故凡救
譏也言次甚譏之也有諸侯在而使大夫將始於牡
丘桓公為之也有諸侯在而使大夫盟始於雞澤悼
公為之也

公孫敖帥師及諸侯之大夫救徐

書救徐何徐卒敗於楚也會救未有書帥師者其稱帥師何公子慶父弑閔者也而敖世為將是故謹志之曰公孫帥師見三家之所從始也

夏五月日有食之

有傳

秋七月齊師曹師伐厲八月螽九

月公至自會季姬歸于鄆

內女嫁恒書歸不書歸必有故也季姬來寧公怒而止之故不書歸至是而後言歸也

已邠晦震夷伯之廟

穀梁有傳

冬宋人伐曹

諸夏之相加兵自莊公之十九年始前此未之有也
於是再見宋襄公為之也

楚人敗徐于婁林

外域交相敗不書

據傳襄十三年楚人敗吳師獲公子黨十四年楚伐吳吳人敗之獲

公子宜穀之類

必敗中國而後書徐戎也何以書病齊也齊

帥天下之諸侯以攘荆楚存中國也楚伐徐桓公合
七國之衆盟於牡丘次于匡以救徐為之伐厲而徐

卒敗於楚人不數年宋楚爭盟執宋公以是為盟主病矣

十有一月壬戌晉侯及秦伯戰于韓獲晉侯

於是秦獲晉侯以歸則其不曰以歸何罪晉侯也獲匹夫之辭也言獲則以歸不足言也是故獲夷狄不

書

據傳卻缺獲白狄子叔孫得臣獲長狄

夷狄交相獲不書

據傳楚獲吳公子黨

吳獲楚公子宜穀

皆不足書也必大國也將尊而師衆若宋

華元齊國書斯可以言獲也宋大國也將尊而師衆

獲之若匹夫然猶曰宋齊之恥晉甸侯也而言獲是夷晉侯於大夫也

十有六年春王正月戊申朔隕石于宋五是月六鷁退

飛過宋都

有公羊傳

三月壬申公子季友卒

大夫卒恒稱名則其兼字之何見三桓之所自始也自是季氏世為卿也故譏之

本劉氏

夏四月丙申鄆季姬卒秋七月甲子公孫茲卒冬十有二月公會齊侯宋公陳侯衛侯鄭伯許男邢侯曹伯于

淮

十有七年春齊人徐人伐英氏夏滅項

於是公猶在齊非公命也向也費伯帥師城郎非公
命不書此何以書城郎常事滅項非常也是故必常
事也譏不及公則不書苟非常則謹書之書滅項失
兵權之漸也襄公在晉書邾庶其來奔昭公在晉書
莒牟夷來奔雖非公命皆非常也春秋之季大夫不
稟命於諸侯非但魯也鄭伯會于夷儀鄭公孫舍之

帥師入陳

事在襄二十五年

蔡侯會于召陵蔡公孫姓帥師

滅沈春秋必謹而志之也

秋夫人姜氏會齊侯于卞九月公至自會

有冬十有二

月乙亥齊侯小白卒

十有八年春王正月宋公曹伯衛人邾人伐齊夏師救齊

書救齊何齊卒敗於宋也

五月戊寅宋師及齊師戰于甌齊師敗績

此宋公也其稱師何於是齊桓公與管仲屬孝公於宋襄公以為太子而桓公卒寺人貂立公子無虧孝公奔宋襄公以諸侯之師伐齊立孝公而還春秋貴義不貴惠尚治不尚功託人之孤而動天下之兵至於交戰是伐喪而已矣雖然孝公不言納孝公言納則疑於齊糾邾捷菑宋襄之義僅異於魯莊晉趙盾而已

狄救齊秋八月丁亥葬齊桓公冬邢人狄人伐衛

狄始稱人

梁本穀

十有九年春王三月宋人執滕子嬰齊

執不言歸未失國之辭也

據成九年鄭伯襄十六年莒子邾子十九年邾子哀

四年小邾子

言歸危不得歸也是故執君不名歸然後名

之執稱曹伯歸稱曹伯襄執稱衛侯歸稱衛侯鄭此
執也則其名何遂失國也舍滕子嬰齊戎蠻子赤則
皆未失國者也虞公失國則其不名何也虞自亡矣
晉人之罪徒執其君焉爾不於執焉加以遂失國之

辭所以見虞之自亡也

嬰齊遂失國本孫氏

夏六月宋公曹人邾人盟于曹南

邾文公在焉則其稱人何人曹邾以貶宋也屬辭疑於北杏曷為謂之貶以明年鹿上之盟亦人宋則未嘗予宋以伯也襄公欲合諸侯而執滕宣公使邾文公用鄆子一會而虐二國之君而亟與楚盟是喪師亡身之道也

鄆子會盟于邾己酉邾人執鄆子用之

說見齊殺子糾

秋宋人

圍曹

此宋公也其稱人何凡圍國雖君將貶人之前年齊桓卒宋公欲合諸侯而亟修怨於曹諸夏之書圍國自此始

衛人伐邢冬會陳人蔡人楚人鄭人盟于齊

楚初與諸夏盟也內不言公諱之也齊桓卒陳非盟主也則曷為會陳人春秋不以外域會中國則推而屬之陳也楚稱人猶未有君也以其人楚不可不人

陳蔡以其人陳蔡不可不沒公也

據傳陳穆公

梁亡

有傳及穀梁傳

二十年春新作南門

有傳例

夏郕子來朝五月乙巳西宮

災鄭人入滑

此鄭公子士洩也不書大夫將恒稱人也

秋齊人狄人盟于邢冬楚人伐隨

二十有一年春狄侵衛宋人齊人楚人盟于鹿上

人自為盟於惡曹見之於是再見其再見何中國無

伯也齊故伯也桓卒宋襄公欲繼之伯而求諸侯於
楚楚於是爭長於宋則是盟也莫適為主人自為盟
而已矣

夏大旱秋宋公楚子陳侯蔡侯鄭伯許男曹伯會于孟
執宋公以伐宋

宋楚初爭長也是故楚稱子而序於陳蔡鄭許曹之
上不知諸侯之從楚與從宋與不予宋以伯也凡執
恒稱人執之於伐則伐稱君執稱人

據齊人執陳
轅濤塗之類於

會則會稱君執稱人

據晉執衛侯之類

雖大夫也則亦會稱

大夫執稱人

據韓不信執宋仲幾

執不稱人執有罪也此楚子

執宋公則曷為不再言楚人不以荆楚執諸夏之辭也是故執宋公不申言楚人執齊慶封亦不申言楚人猶曰諸侯執之焉爾

冬公伐邾楚人使宜申來獻捷

君使大夫何以特稱人貶之也孟會稱子矣獻捷於魯何以貶人之孟會不稱子無以見楚宋之爭長獻

捷於魯不人之則是遂予楚也自是至椒之聘而後始有君大夫於以見春秋之許夷狄也

十有二月癸丑公會諸侯盟于薄釋宋公

外釋不志

本穀梁傳例據傳僖二十八年以專釋衛侯但書歸

此何以志以宋

公為無歸道也是故執不言歸者善辭也言歸危辭也不言歸言釋直釋之爾無歸道也向也楚初與盟不書公於是書公不予楚以專釋之辭也

梁本穀

二十有二年春公伐邾取須句

春秋嚴義利之辨苟以為利一以取書之是故雖邾人滅須句須句子來奔伐邾取須句反其君焉書取須句雖莒著丘公立而不撫鄆鄆叛而來書取鄆

夏宋公衛侯許男滕子伐鄭秋八月丁未及邾人戰于升陘冬十有一月己巳朔宋公及楚人戰于泓宋師敗

績

有穀
梁傳

楚嘗有君矣此楚子也其稱人何楚君將猶稱人也二十有三年春齊侯伐宋圍緡夏五月庚寅宋公茲父

卒秋楚人伐陳

此成得臣也不書楚大夫將猶稱人也

冬十有一月杞子卒

有傳凡例非是說在章指

二十有四年春王正月夏狄伐鄭秋七月冬天王出居

于鄭

有傳

王出不書為尊尊諱也

據莊二十年惠王處櫟定六年敬王處姑猶

其言

出居于鄭何以為無足諱焉耳子頽之難惠王未有過也鄭虢圖之執燕仲父殺子頽逾年而復辟故諱

之也襄王以狄伐鄭富辰諫弗聽又德狄以狄女為
后諫弗聽子帶以狄師攻王王御士將禦之又弗聽
於是適鄭書曰天王出居于鄭以為無足諱焉耳雖
然猶未書入也春秋善復正言入未足以言復正也
襄王書出矣已而書王許書滅矣事在定六年已而書許
男事在哀元年必如是而後可以言復正也

晉侯夷吾卒

二十有五年春王正月丙午衛侯燬滅邢

三傳同

夏四月

癸酉衛侯燬卒宋蕩伯姬來逆婦

本劉氏

公自主之也

宋殺其大夫

無傳

秋楚人圍陳納頓子于頓

出罪也納之者亦罪也則悉書之

據北燕伯款
衛世子蒯聵

出非

其罪納之者罪也則但書納齊桓公卒楚始與諸夏
盟于齊盟于鹿上執宋公納頓子侈然欲廢置諸侯
矣春秋之所懼也

葬衛文公冬十有二月癸亥公會衛子莒慶盟于洮

有穀

梁傳

二十有六年春王正月己未公會莒子衛甯速盟于向齊人侵我西鄙公追齊師至鄆弗及

此齊侯也其稱人何自隱以來以兵加我君大夫將皆書人君將書君自文十五年齊懿公始大夫將書大夫自襄十七年齊高厚始訖春秋惟莒邾書人夏齊人伐我北鄙衛人伐齊公子遂如楚乞師

乞師不書

據成二年臧宣叔如晉乞師

乞諸荆蠻然後書外乞師

亦不書必盟主也而後書乞卑辭也乞諸荊蠻然後
書志中國之訕於荊蠻也

秋楚人滅夔以夔子歸

滅同姓名此楚子頽也則其不名何楚子之名未登
於春秋也楚自武王始見於傳文王始見於經猶以
州舉也至成王而後書楚人孟之會嘗書楚子矣而
復人之頽之名非遇弑未登於春秋則滅夔固不名
也滅夔名之則疑於衛侯燬不名楚子則不名夔子

也

冬楚人伐宋圍緡公以楚師伐齊取穀

傳例說在章指

公至自

伐齊

二十有七年春杞子來朝

有傳

夏六月庚寅齊侯昭卒秋

八月乙未葬齊孝公乙巳公子遂帥師入杞冬楚人陳

侯蔡侯鄭伯許男圍宋

有穀梁傳

楚嘗有君矣

據會于孟

此楚子也

據傳

則其稱人何嬖子楚

以伯也盟于齊楚猶序陳蔡之下於鹿上猶不先齊

宋也孟之會宋楚始並為諸侯長矣楚之稱子而長於諸侯宋襄公為之也魯僖衛文夫子之刪詩有取焉桓公卒而衛從楚魯又從楚楚敗宋于泓納頓子滅夔取齊之穀且合四國之君以圍宋春秋以是為夷狄之強而已矣雖序於諸侯之上而特人之不稱人則疑於莊王

十有二月甲戌公會諸侯盟于宋

二十有八年春晉侯侵曹晉侯伐衛公子買戍衛不卒

戍刺之楚人救衛

楚嘗救鄭矣不書

見傳僖六年
二十二年

於是始書以為晉文

之伯楚欲救而不能也

三月丙午晉侯入曹執曹伯畀宋人

入雖君將貶人之此其稱晉侯何必若晉文入曹而後可以無貶也

夏四月己巳晉侯齊師宋師秦師及楚人戰于城濮楚

師敗績

此宋公齊國歸父秦小子憖也宋公也則何以但稱
師尊晉侯也尊晉者子晉以伯也楚得臣何以稱人
楚未有大夫將也

楚殺其大夫得臣

於是楚子使止子玉曰毋死不及則其斥殺何春秋
之法苟有誅意於其臣雖自殺也書殺是故楚得臣
公子側皆書殺而已矣

衛侯出奔楚五月癸丑公會晉侯齊侯宋公蔡侯鄭伯

衛子莒子盟于踐土

卷五

序晉侯於齊侯宋公之上予晉以伯也於是王子虎

實盟諸侯則其不書何凡王人涖盟不書

據宣七年王叔桓公

涖伐不書

據文三年王叔桓公成十三年劉康公成肅公

陳侯如會公朝于王所

有穀梁傳

此踐土之諸侯也外朝王不書

據隱六年鄭伯八年齊鄭莊十八年晉號

書魯以見其餘也於是晉侯將盟于踐土而王即命

為方伯諸侯朝焉則先朝而後盟曷為先書盟後書

朝書朝而後盟是以天子與斯盟也書盟而後朝春

秋不以天子與斯盟之辭也

穀梁諱會天王也

六月衛侯鄭自楚復歸于衛

君歸不言自必大夫也而後言自人臣無專歸之道也君而言自者危不得歸也是故晉文實復衛侯而曰自楚危自楚也晉厲實歸曹伯而曰自京師危自京師也

衛元咺出奔晉陳侯款卒秋杞伯姬來

義見莊二十七年

公子遂如齊冬公會晉侯齊侯宋公蔡侯鄭伯陳子莒
子邾子秦人于溫天王狩于河陽

有傳

王狩不書

本公羊傳據莊二十一年王巡守說

此何以書非狩也於是

晉侯將會於溫召王以諸侯見而以狩書也王有事
譏不在諸侯則以自致之文書之此晉侯之罪爾則
曷為以自狩為文為尊尊諱也晉侯將會于溫召王
以諸侯見則先狩而後會曷為先書會後書狩書狩

而後會是以天子與斯會也先書會後書狩春秋不

以天子與斯會之辭也

穀梁諱會天王也

壬申公朝于王所

有穀梁傳

朝踐土不繫日此繫日何見先狩而後朝也王嘗至踐土而不言狩則王意也至溫非王意也至踐土王意也則可以但言朝至溫非王意也則不可以但言朝故書曰天王狩于河陽壬申公朝于王所朝而繫日雖諱而諸侯致天子之實見矣齊桓公盟王人不

盟宰周公殊會世子晉文公實致天子而朝之故曰
齊桓公正而不譎晉文公譎而不正

晉人執衛侯歸之于京師

於是命晉侯為伯矣執衛侯是伯討也則其稱人何
非王命也樊皮叛王王命虢公討之虢公入樊執樊
仲皮歸于京師不書是故凡執譏也春秋猶以當乎
罪不當乎罪為褻貶苟當乎罪雖晉厲公執曹伯得
為伯討苟不當乎罪雖齊桓執陳轅濤塗稱人而已

矣

衛元咺自晉復歸于衛

歸大夫不言復必諸侯也而後言復君有歸道也大
夫言復者伉也是故元咺復歸宋魚石晉欒盈復入
皆伉辭也

諸侯遂圍許曹伯襄復歸于曹

執君不言歸言歸危不得歸也

遂會諸侯圍許

二十有九年春介葛盧來

介東夷也宜書來者也昔者衛侯來會惠公葬隱公
不見不書今公猶在會亦不見介人則何以書介東
夷也未通於上國一歲再至其意將安在乎故亟書
之介人侵蕭譏有以來之也

公至自圍許夏六月會王人晉人宋人齊人陳人蔡人

秦人盟于翟泉

有傳

此晉狄偃宋公孫固齊國歸父陳轅濤塗也曷為不

序晉初以大夫盟王子也向也踐土之役王子虎不
書涖盟也今以大夫盟王子文公之志荒矣大夫之
交政於是始文公為之也不斥言王子虎為尊尊諱
也以其人王子虎不可不徧人諸侯之大夫以其徧
人諸侯之大夫不可不沒公也是故齊初主盟不言
公莊十六年盟齊楚向與盟不言公僖十九年盟齊晉大夫初會盟
不言公皆譏不在魯也

秋大雨雹冬介葛盧來

春秋以一字為褒貶於介乎何費辭也春秋雖以一字為褒貶而或費辭者詳始以著末也三月癸酉大雨震電庚辰大雨雪正月己卯烝夏五月丁丑烝將著其末不可不詳其始也

三十年春王正月夏狄侵齊秋衛殺其大夫元咺及公子瑕衛侯鄭歸于衛

向也言復歸今歸不言復何奔失國之辭也執未失國之辭也凡執不言歸

成九年鄭伯襄十六年莒子邾子十九年邾子

執而

言歸危不得歸也是故執君不名歸然後名之執書
衛侯歸書衛侯鄭執書曹伯歸書曹伯襄名之者亦
失國之辭也

晉人秦人圍鄭

此晉侯秦伯也曷為貶稱人晉帥天下之諸侯以攘
戎狄存中國也而圍鄭鄭未有罪焉爾於是秦伯私
與鄭盟戍鄭而去之子犯請擊秦晉侯曰微夫人之
力不及此吾其還也蓋秦晉之怨自此始

介人侵蕭冬天王使宰周公來聘公子遂如京師遂如
晉

自桓王以下王室無聘魯者於是再聘而宰周公實

來則已尊矣公子遂如京師遂如晉以其如京師不

敢不如晉是夷周於晉也吾大夫如京師不書

據魯頌季

孫行父於是始書之聘周非常事矣

三十有一年春取濟西田公子遂如晉夏四月卜郊

不從乃免牲猶三望

有傳公羊傳

諸侯之有郊禘東遷之僭禮也故曰秦襄公始列於諸侯作西畤祠白帝僭端見矣位在藩臣而臚於郊祀君子懼焉則平王以前未有也魯之郊禘惠公請

之也

據邵氏經世書惠公止於秦襄公祠白帝之年

齊桓公欲封禪而晉亦

郊鯨皆僭禮也然則春秋何以始見於僖公向者莊公之觀齊社也曹劌諫曰天子祀上帝諸侯會之受命焉諸侯祀先王先公卿大夫佐之受事焉用見惠公雖請之而魯郊猶未率為常也僖公始作頌以郊

為夸焉於是四卜不從猶三望是故特書之以其不

勝譏譏其甚焉者爾

記禮者以為魯禮皆成王賜之以康周公案衛祝鮀之言曰周

公相王室以尹天下於周為睦分魯以大路大旂夏后氏之璜封父之繁弱殷民六族以昭周公之德分之土田陪敦祝宗卜史備物典策官司彝器則成王命魯不過如此隱公考仲子之宮問羽數於衆仲周公閱來聘饗有昌獸白黑彤鹽周公以為備物辭不敢受衛甯武子來聘宴之賦湛露及彤弓武子不荅賦曰諸侯朝正於王於是乎賦湛露諸侯敵王所愾而獻其功於是乎賜之彤弓陪臣其敢干大禮以自取戾假如明堂位之言得用郊禘兼四代服器官祝鮀不應不及況魯行天子之禮久矣則羽數何以始問於隱公昌獸彤鹽以之饗天子之上公安用固辭湛露彤弓甯武子何以不荅且致譏焉於以見魯僭

未久上自天子之宰至於兄弟之國之卿苟有識者皆云魯遜謝而魯人並無一語及於成王之賜以自解用郊禘之說當從劉恕太史公博極羣書定以為僭郊禮始於秦襄而恕亦該洽懷自史角之事之外有傳記與明堂位之禮合則外紀豈獨遺佚乎

秋七月冬杞伯姬來求婦狄圍衛十有二月衛遷于帝丘

三十有二年春王正月夏四月己丑鄭伯捷卒衛人侵狄秋衛人及狄盟冬十有二月己卯晉侯重耳卒

三十有三年春王二月秦人入滑齊侯使國歸父來聘

夏四月辛巳晉人及姜戎敗秦師于殽

外相敗不書

據成三年諸侯伐鄭鄭敗諸丘與此何四年鄭疆許田許敗之展陂之類

以書惡晉也晉之伯秦有力焉自城濮以來無役不從也文公未葬襄公墨衰及姜戎氏要秦師於殽敗之夫晉帥天下之諸侯以攘外寇存中國也秦有力焉而及姜戎敗之秦晉之構怨自是始更三君交兵無虛歲曾不十年晉遂不競而楚伯是故外會師而不及

據隱五年邾鄭伐宋成九年秦人白狄伐晉之類

特書及而晉侯貶稱

人

本穀梁

然則善秦與自韓原秦師無君大夫則非善

秦也晉遂不競而楚伯秦亦與有力焉耳

癸巳葬晉文公狄侵齊公伐邾取訾婁秋公子遂帥師伐邾晉人敗狄于箕

中國敗外域不書

據隱九年鄭人大敗戎師閏二年虢公敗犬戎之類

唯晉特

書之特書晉者皆病晉也故晉侯貶稱人晉帥天下

諸侯以攘外寇存中國也前年狄侵齊去年狄侵衛衛為之遷帝丘而晉不能救於是伐晉蓋僅而後勝

之也晉侯稱人以是為盟主病矣

冬十月公如齊十有二月公至自齊乙巳公薨于小寢

左氏穀
梁傳同

隕霜不殺草李梅實晉人陳人鄭人伐許



春秋後傳卷五

欽定四庫全書

經部

陳氏春秋後傳卷六
七

詳校官監察御史_臣李陽樞

給事中_臣溫常綬覆勘

覆校官庶吉士_臣徐立綱

校對官主簿_臣汪日贊

謄錄監生_臣張鴻仁

欽定四庫全書

春秋後傳卷六

宋 陳傅良 撰

文公

元年春王正月公即位二月癸亥日有食之天王使叔服來會葬夏四月丁巳葬我君僖公天王使毛伯來錫公命

自隱至文六君惟桓文書即位而後書錫命以其自即位也

晉侯伐衛

於是晉告於諸侯而伐衛先且居曰效尤禍也請君
朝王臣從師晉侯朝王於溫先且居胥臣伐衛則其
但書君何春秋罪戎首苟其君意雖卿帥不書是故
伐衛書晉侯不書先且居伐秦書晉侯不書欒書

在事

成十三年

滅偃陽書晉侯不書荀偃士匄

襄十年

伐晉書衛

侯不書孔圉

哀元年

所謂春秋深探其本也春秋雖罪

戎首而宥不得已是故小國役大國往往不書伐齊

之役邾邾不書

事在哀十年

滅陳書楚不書宋戴惡也

叔孫得臣如京師衛人伐晉

此衛孔達也其稱人何大夫將猶稱人也

秋公孫敖會晉侯于戚冬十月丁未楚世子商臣弑其君頹

楚卒未志

據傳楚武王卒于莊四年文王卒于十九年

其志頹何世子弑

君不可以楚不志也

公孫敖如齊

二年春王二月甲子晉侯及秦師戰于彭衙秦師敗績
此孟明視也其稱師何秦未有大夫也

丁丑作僖公主

有傳凡例
說在章指

三月乙巳及晉處父盟

有傳
公羊

穀梁
同

朝而遂盟之於是始傳曰適晉不書諱之也凡諱國
惡耻在公則但書其事不書公者恒辭也諱在其事
則但書公不書其事公會晉侯于黑壤為公不與盟
故不書盟

宣七年
有傳

公如晉為止公送葬故不書葬

成
十

年皆甚諱之也會晉師于上鄆削而不書諱不足以有傳

盡之矣是故諱有愛君之誼焉必譏不及君而後諱舍是無諱道矣故曰諱莫如深也

夏六月公孫敖會宋公陳侯鄭伯晉士穀盟于垂隴

有傳

穀梁內大夫可以會外諸侯非是

晉遂以大夫盟諸侯也大夫而與諸侯敵於是始故書大夫專盟自士穀也士穀非卿也特書之見晉之卑諸侯也然則士穀主是盟也則曷為序士穀於諸

侯之下春秋不以大夫主盟也是故訖于宋不以大夫主盟翟泉貶此何以不貶貶不於其甚則於事端餘實錄而已矣是故書士穀自書士穀而后凡役書

大夫桓文之伯也會盟有大夫則但稱人據僖元年會權邦人

二十八年會溫秦人之類必世子也則得次小國之君自垂隴主

士穀新城主趙盾而后大夫與諸侯序於是戚之盟

書齊國佐成十五年沙隨之會書宋華元成十六年甚者無伯

而君與大夫並列於會矣定十年齊侯衛侯鄭游速會于安甫

自十有二月不雨至于秋七月八月丁卯大事于太廟

躋僖公

三傳同大事
從公穀傳

冬晉人宋人陳人鄭人伐秦

傳言
尊秦

非經
意

嘗書大夫矣此晉先且居宋公子成陳轅濤塗鄭公
子歸生也曷為不序大夫將猶稱人也自士穀專盟
書大夫自陽處父專將書大夫是故春秋之始大夫
將恒稱人由救鄭之後大夫始貶稱人矣

公子遂如齊納幣

公羊有傳左氏凡
例不取杜說尤悖

三年春王正月叔孫得臣會晉人宋人陳人衛人鄭人

伐沈沈潰

傳例說在章指

夏五月王子虎卒

說在莊二十二年公穀以為叔服非

是

秦人伐晉

此秦伯也曷為貶稱人穀之誓孔子有取焉而秦穆之連兵無虛歲君子以為秦之未離乎西戎也是故自韓原秦不以爵見於經至康公而遂外之終南蒍葭之作秦非無人也而秦不用誠未離乎西戎也

秋楚人圍江雨螽于宋冬公如晉十有二月己巳公及
晉侯盟晉陽處父帥師伐楚以救江

晉大夫書帥師於是始大夫強也處父盟魯侯以王
叔桓公伐楚蒐於董易中軍是故雖荀息里克不言

帥師

僖二年

必若處父而后言帥師自是恒書大夫貶

而后人之書救何江卒滅於楚也向也曰晉處父今
曰晉陽處父命大夫也是故自鄆黎來為小邾子無
未命諸侯潞子戎蠻子皆有君矣自晉處父為陽處

父無未命大夫曹公子首邾庶其皆有大夫矣文宣
之後大夫舍宋山無去其氏諸侯舍杞子無黜其爵
者皆春秋之變文也

四年春公至自晉夏逆婦姜于齊

有傳穀梁成禮於齊非是

狄侵齊

秋楚人滅江

滅不言圍此其書圍何以病晉也陽處父伐楚以救
江而江卒滅於楚言圍見其久也久之所以病晉也
僖之三十二年楚鬬章請平于晉晉陽處父報之晉

楚始通文公為之也

晉侯伐秦衛侯使甯俞來聘冬十有一月壬寅夫人風氏薨

夫人某氏薨嫡稱也此莊公之妾也則曷為以嫡稱稱之喪之以夫人之禮也隱公之喪桓母猶有疑焉是故別廟也祔姑稱謚佯然如夫人則自文公之喪成風始也

五年春王正月王使榮叔歸含且賵

以成風之喪赴京師也。贈常事不書。唯贈仲子成風特書之。則遂命為夫人也。春秋之初猶以是為非常事也。宣之敬嬴襄之定姒昭之齊歸。雖命之為夫人。不復書矣。孟子卒則不赴於京師。孔子曰夫人之命於天子。自魯昭公始也。

三月辛亥葬我小君成風。王使召伯來會葬。

王不稱天於追錫桓公。見之至是再見。其再見何以夫人之禮喪成風也。莊僖之際天下知有盟主而已。

而襄王之季年更有事於諸侯於是叔服會葬毛伯
錫命尤汲汲於魯也尤汲汲於魯而何為乎成風一
人贈含之一人葬之以是懷諸侯吾見周之益陵夷
也宰咺嘗以贈妾母貶則召伯何以不貶王公一體
也宰書名則王不待貶而自見王不稱天則召伯不
待貶而自見也文武之教著於南雅莫急於君夫人
也桓以少簋長成風以庶亂嫡王道熄矣而莊襄不
能正又從而襄賞之是以天命施之天討也是故皆

不稱天

夏公孫敖如晉秦人入郟秋楚人滅六冬十月甲申許男業卒

六年春葬許僖公夏季孫行父如陳秋季孫行父如晉八月乙亥晉侯驩卒冬十月公子遂如晉葬晉襄公晉殺其大夫陽處父

有傳說在章指

晉狐射姑出奔狄

兩下相殺不道於是狐射姑使續鞠居殺陽處父則其書國殺何春秋之法苟有賊而不知則其君之罪

也晉蒐于夷使狐射姑將中軍陽處父改蒐于董易
中軍襄公無討焉於是使續鞠居殺陽處父是故晉
胥童殺三卻藥書中行偃殺胥童齊崔杼殺高厚鄭
子展子西殺公子嘉皆稱國而已矣

閏月不告月猶朝于廟

七年春公伐邾三月甲戌取須句遂城郕夏四月宋公

王臣卒宋人殺其大夫

有傳穀梁誅
有罪也非是

此公孫固也則其不名何昭公之大夫也昭公新立

曷為於此焉不名其大夫是春秋之大變也自隱而下春秋治在諸侯天子無道則不徒罪諸侯也於是
有宰書名王子書名甚者王不書天自文而下春秋
治在大夫諸侯無道則不徒罪大夫也於是有弑君
稱人甚者稱國弑君天下之元惡也舍賊而稱人自
宋昭公始是春秋之大變也是故終昭公之世不名
其大夫春秋有天下之辭焉有一國之辭焉有一人
之辭焉於晉靈公凡會盟皆不序諸侯是天下之辭

也於魯莊公凡會齊襄皆書人是一國之辭也於魯桓公凡大夫將皆不言大夫於宋昭公凡大夫皆不名是一人之辭也

戊子晉人及秦人戰于令狐

晉將嘗書大夫此趙盾及秦伯也曷為貶稱人秦晉之交兵於是再世自令狐之後連兵不悉書矣於八年秦伐晉取武城不書于十年晉伐秦取少梁不書晉襄公卒欲立長君逆公子雍于秦秦康公以兵送

之晉禦秦師則康公何貶焉春秋貴誼不貴惠尚治
不尚功托人之孤至於交戰是亦伐喪而已矣是故
宋襄公立齊孝公戰于甌貶人之秦康公送晉公子
雍戰于令狐貶人之

晉先蔑奔秦

不言出從公穀

狄侵我西鄙秋八月公會諸侯晉

大夫盟于扈

傳例說在章指

垂隴嘗書士穀而序諸侯此公會齊侯宋公衛侯陳
侯鄭伯許男曹伯晉趙盾也則何以不序晉始失伯

也凡稱諸侯必先目而後凡也前有王人後無王人

書曰諸侯盟于某則王人嘗不與也

據首止王世子癸丘宰周公

前無吾君後有吾君書曰公會諸侯盟于某則吾君

嘗不與也

據僖二十一年盟薄二十七年盟宋

未始有不與者也而但

曰諸侯一從而再有事也

僖二十八年國許襄十八年盟祝柯二十五年盟重

丘非一役而再有事則非凡辭也非凡辭者散辭也

冬徐伐莒公孫敖如莒泣盟

八年春王正月夏四月秋八月戊申天王崩冬十月壬

午公子遂會晉趙盾盟于衡雍乙酉公子遂會雒戎盟于暴傳有公孫敖如京師不至而復丙戌奔莒螽宋人殺

其大夫司馬

傳有

此公子邛也則其不名何昭公之大夫也於是襄夫人因戴武之族以殺大司馬公子邛則何以稱人稱人殺有罪之辭也六卿和公室樂豫舍司馬以讓公子邛則曷為例之以有罪不名所以別其非有罪也不名所以別其非有罪則稱人衆辭也

宋司城來奔

有傳

大夫奔恒名之此蕩意諸也則其不名何昭公之大夫也凡奔非其罪不書苟接我也不可以不書則不以同盟之例書之是故未有書官者於是官從其官

司馬司城是也未有書字者於是字從其字

據宋子哀

九年春毛伯來求金

有傳公羊傳

自是魯雖不修貢周無求矣周室益衰而頃王之崩

葬不見於經

夫人姜氏如齊二月叔孫得臣如京師辛丑葬襄王

王喪卿共喪事不書此何以書夷周於晉也前年公子遂葬襄公今年叔孫得臣葬襄王是夷周于晉也是故苟常事雖季孫行父請命不書苟非常也雖叔孫得臣會葬書

晉人殺其大夫先都三月夫人姜氏至自齊晉人殺其大夫士穀及箕鄭父楚人伐鄭公子遂會晉人宋人衛人許人救鄭

兵將嘗書大夫此晉趙盾宋華耦衛孔達也曷為貶
稱人晉遂不競而楚莊伯也傳曰卿不書緩也以懲
不恪是故凡救不書必救而無功然後書救非善辭
也自是而救不勝譏矣

夏狄侵齊秋八月曹伯襄卒九月癸酉地震冬楚子使

椒來聘

有公
羊傳

自孟之會楚復稱人此其稱楚子何以其能聘也

秦人來歸僖公成風之襚

成風祔姑稱諡伉然如夫人矣其曰僖公成風修春秋之辭也夫人風氏薨葬我小君成風未修春秋之辭也由成風而下宣母敬嬴襄母定姒皆從舊史之文實錄而已

葬曹共公

十年春王三月辛卯臧孫辰卒夏秦伐晉

外秦也歸成風之襚使術來聘秦習於禮矣則其狄之何楚之伯秦之力也自滅庸以後秦為楚役自晉

主諸夏之盟舍秦無加兵於晉者也會于夷儀之歲
秦晉成而不結又明年盟于宋而南北之勢成楚子
曰釋齊秦他國請相見也是戰國之萌也於次國風
退秦於魏唐之後於序書系秦于周末於作春秋由
韓原之後秦帥無君大夫皆夫子所以深致意於秦
也於詩存秦風於書存秦誓皆兵事於是外秦兵
加於盟主秦人為之也又三十年而外鄭又五十年
而外晉外鄭猶可也外晉甚矣

楚殺其大夫宜申

討亂不書於是鬪宜申謀弑穆王則何以書宜申之
罪為欲弑商臣也宜申之罪為欲弑商臣若此而同
之他亂臣之列則溢罰矣是故蔓成然事在昭十四年弑者
之黨也殺之不書宜申弑者之讎也殺之書臣子可
以知勸懲矣

自正月不雨至于秋七月及蘇子盟于女栗冬狄侵宋
楚子蔡侯次于厥貉

外會未有言次者

據襄元年晉侯衛侯次于戚之類

此其言次何以

楚之欲圖伯而未集也晉雖不競君大夫數會而不
序春秋重絕晉也會于息宋陳鄭嘗從楚矣已而為
新城之盟則楚子猶未得志于宋陳鄭也於是息會
不書書及蔡次厥貉用見楚之未得志于諸侯也
十有一年春楚子伐麋

楚初書君將也自是楚師必圍滅也而後貶人之
夏叔仲彭生會晉卻缺于承匡秋曹伯來朝公子遂如

宋狄侵齊冬十月甲午叔孫得臣敗狄于鹹

內大夫將言帥師其不言帥師何危之也凡君將不

言帥師重在君也言師不言君者危師之辭也

據莊八年

師及齊師圍邾

大夫將言帥師重在師也言將不言師者危

將之辭也

十有二年春王正月邾伯來奔

有傳

此邾太子朱儒也則其曰邾伯何逆之以諸侯之禮

也春秋之法苟非諸侯雖嘗當國不成君也是故有

衛侯朔則黔年八年不成君有鄭伯突則子儀十四年不成君雖衛叔武列於會矣猶曰衛子爾此邲太子也魯逆以諸侯之禮吾從而志之無改焉何也唯其如二君也廢立之際足以亂名實則春秋不可以弗辨苟無亂於名實則春秋不辨也春秋之作別嫌明微而已有不待辨而自見春秋何治焉邲太子朱儒魯謂之邲伯晉太子州蒲晉謂之晉侯從而志之徒見其悖禮焉爾雖然凡諸侯奔則書復奔不書復

者遂失國也失國恒名之

據莊二十四年曹羈昭二十二年蔡侯朱二十三年

莒子庚與

此其不名何以為邾伯未修春秋之辭也苟以

為邾伯朱儒則是修春秋之辭矣故凡從主人則徒

修春秋之辭也

杞伯來朝二月庚子子叔姬卒

有傳

女未嫁不卒此何以卒許嫁而絕則喪以夫人之禮

也以子叔姬見僖之喪伯姬也

傳言杞桓公來朝請絕叔姬而無絕婚則

是叔姬先絕復求其次杜說非

夏楚人圍巢秋滕子來朝秦伯使術來聘

自韓原之戰秦恒稱人此其稱秦伯何以其能聘也

冬十有二月戊午晉人秦人戰于河曲

此秦伯晉趙盾也曷為貶稱人亟戰也

本穀梁

於是范

山言於楚子曰晉君少不在諸侯北方可圖也而秦

晉亟戰秦晉亟戰而楚君將稱君矣是故戰必言及

而不言及不以秦晉主此戰也不以秦晉主此戰猶

曰夫人戰焉耳略之也秦人白狄伐晉首從之辭也

晉人及姜戎敗秦師于殽敵辭也晉人秦人戰于河
曲略之之辭也

季孫行父帥師城諸及鄆

十有三年春王正月夏五月壬午陳侯朔卒邾子蘧蒢
卒自正月不雨至于秋七月太室屋壞

三傳同

冬公如晉

衛侯會公于沓狄侵衛十有二月己丑公及晉侯盟公
還自晉鄭伯會公于棐

十有四年春王正月公至自晉邾人伐我南鄙叔仲彭生

帥師伐邾夏五月乙亥齊侯潘卒六月公會宋公陳侯
衛侯鄭伯許男曹伯晉趙盾癸酉同盟于新城

向也扈之盟不序諸侯此其復序何諸夏之志也晉
救江無功救鄭無功與秦亟戰而楚浸強交聘於中
國得蔡次厥貉矣而晉遂不競於是公朝晉衛侯來
會公還自晉鄭伯來會諸夏之懼甚矣汲汲於晉而
為此盟如之何勿序也以諸夏之汲汲於晉也而徒
以趙盾主是盟書曰同盟同衆辭也自幽以來未之

有也則不予晉以主是盟之辭也

秋七月有星孛入于北斗公至自會晉人納捷菑于邾弗克納

此晉趙盾以諸侯之師曷為貶稱人以晉為不競也
楚方交聘于上國得蔡次厥貉矣而晉區區納亡公
子於邾又以少陵長見辭於邾人自敗秦于令狐盟
于扈救鄭戰河曲趙盾皆不書由是訖靈公之篇兵
車之會自參以上貶人之

宣十七年伐宋
宣二年侵鄭

趙盾為之也

九月甲申公孫敖卒于齊

有穀梁傳

齊公子商人弑其君舍

未踰年之君卒不書

據衛戴公

奔則但書名

據鄭忽

舍未踰

年何以得稱君

本穀梁傳

以弑罪罪商人也是故陳佗齊

無知莒展輿逾年矣而不成君舍未逾年也而成君

苟弑其君世子雖成君不君之苟見弑于其臣子雖

未成君君之春秋之大義也

宋子哀來奔

有傳

奔大夫恒名之此其不名何昭公之大夫也

冬單伯如齊齊人執單伯

春秋書周大夫如吾大夫然內之也伯者作天下不知有王久矣於是魯之請昭姬晉之命隨會猶假寵於王室而文宣之際王卿士數有事於四方救江之役黑壤之盟王叔桓公在焉蓋汲汲於晉葬僖公錫文公命贈含成風王季子來聘尤汲汲於魯也而齊人執單伯以天子之使而見執於齊商人諸侯莫為之變焉則王室益不競矣以天子之使而見執春秋

所甚懼也王叔陳生嘗相周矣晉悼公執之則何以
不書傳曰士魴如京師言王叔之貳於戎也則是為
京師執之也為京師執之而與執單伯同罪則溢罰
矣

齊人執子叔姬

十有五年春季孫行父如晉三月宋司馬華孫來盟
此華耦也則其不名何昭公之大夫也

夏曹伯來朝齊人歸公孫敖之喪六月辛丑朔日有食

之鼓用牲于社單伯至自齊

有傳

吾大夫不至必見執而後至春秋書周大夫如吾大夫然故至單伯也

晉卻缺帥師伐蔡戊申入蔡

傳例說在章指

入不言伐言伐甚伐者也入未有書大夫者於是書卻缺始自是訖春秋入稱人者邾也稱國者吳越也邾吳越無大夫也是故自伐書陽處父入書卻缺侵書趙穿

宣元年

由是凡役書大夫雖大夫自為戰書大

夫

宣二年
宋鄭

甚者大夫與君戰亦書大夫

宣十二年
之戰成二年

韋之

是經之變文也

秋齊人侵我西鄙季孫行父如晉冬十有一月諸侯盟

于扈

傳例說
在章指

向也扈之盟趙盾為之則其不序諸侯猶曰太夫主

是盟也此晉侯宋公衛侯蔡侯陳侯鄭伯許男曹伯

也則曷為不序散辭也新城之盟不可以不序徒以

諸夏之志焉耳而晉侯不出於是楚伯成而頃王崩

葬不見於春秋諸侯無統紀甚矣故終靈公之篇凡合諸侯皆散辭傳曰無能為也

十有二月齊人來歸子叔姬

內女來歸凡三見於經此其言齊人來歸子叔姬何非其罪也叔姬配昭公生舍昭公卒舍即位商人弑之於是執叔姬

齊侯侵我西鄙遂伐曹入其郭

一役而再有事不悉書也苟悉書也則以遂言之兵

事言遂必天下之大故也此其言遂何齊始敗夏盟也晉文公卒襄公能合諸侯靈雖不競而新城之盟諸夏汲汲焉固結之則猶有屬也而齊獨為亂階執天子之使加兵於魯於是伐曹晉遂不競而諸侯貳故悉書之也傳曰謂諸侯不能也是故入郛皆不書

據隱五年郛鄭伐宋入郛之類

於齊特書之侵我皆書人於是書齊

侯異其文者異其事也

十有六年春季孫行父會齊侯于陽穀齊侯弗及盟

梁穀

有夏五月公四不視朔

穀梁有傳

六月戊辰公子遂及齊侯

盟于鄆丘秋八月辛未夫人姜氏薨毀泉臺楚人秦人

巴人滅庸

此楚子也滅猶未書君將也

冬十有一月宋人弑其君杵臼

有傳

弑未有稱人者其稱人何猶曰衆人殺之焉耳孔父

死於殤仇牧死於閔蕩意諸死於昭宋為有臣子矣

宋非無臣子則弑其君罪不在其臣子矣是故大夫

未有書官者終昭公之篇大夫特書官而意諸不言
及大夫而不書官則臣子何罪意諸而言及則昭公
疑於殤閔然則宋公孰弑襄夫人也賊由夫人使之
若衆人然以是為君不君也是故立公子鮑而鮑免
於首惡之名春秋無譏焉爾於是司城須奉昭公子
以為亂而鮑殺之須母弟也殺母弟不書以是為鮑
宜立者也

十有七年春晉人衛人陳人鄭人伐宋

有傳

此晉荀林父衛孔達陳公孫寧鄭石楚也曷為貶稱
人不予以討賊之義也宋賊無主名宜若勿討則其
責諸侯以討之何子弑父凡在宮者殺無赦臣弑君
凡在官者殺無赦衆人弑其君亦勿罪臣子而已矣
賊奈何勿討也賊可以勿討則昭公書葬矣賊可以
勿討而書葬其惟魯初葬靈乎二君之禍非其國臣
子為之也

夏四月癸亥葬我小君聲姜齊侯伐我西鄙六月癸未

公及齊侯盟于穀諸侯會于扈

有傳

秋公至自穀冬公子

遂如齊

十有八年春王二月丁丑公薨于臺下秦伯瑩卒夏五月戊戌齊人弑其君商人

商人之罪嘗著於春秋曷為書弑如他君久矣其為君也春秋位號從主人不以正不正未嘗有國雖鄭忽不可不謂之世子嘗有國雖商人不可不謂之君然則商人無罪歟以蔡般之見殺宜不名而名之則

商人罪不容誅矣然則齊侯孰弑閻職邠歆也閻職
邠歆微不稱盜而稱齊人所以罪商人也君商人人
閻職邠歆其實各得天矣

六月癸酉葬我君文公秋公子遂叔孫得臣如齊冬十

月子卒

有傳

惡位未定則其稱子卒何成之為在喪之君也凡君
在喪恒稱子猶未葬也則稱子某

莊公子般
襄公子野

於是公

子遂殺惡而立宣公故成之為在喪之君以弑罪罪

宣公也

夫人姜氏歸于齊季孫行父如齊莒弑其君庶其

弑未有書國者其稱國何猶曰國其國也而以自弑
焉爾稱人罪不在臣子稱國罪不在衆人矣然則莒
子孰弑太子僕也莒子生太子僕又生季佗愛季佗
而黜僕而以自禍衆人何罪焉故凡稱國必易樹子
殺大臣者也樹子吾貳也大臣吾股肱也親莫親於
斯貴莫貴於斯賊由斯人是自賊也

陳氏春秋後傳

欽定四庫全書

春秋後傳卷七

宋 陳傅良 撰

宣公

元年春王正月公即位公子遂如齊逆女三月遂以夫

人婦姜至自齊

有傳說在章指

夏季孫行父如齊晉放其大夫

胥甲父于衛公會齊侯于平州公子遂如齊六月齊人

取濟西田

外取邑不書雖取諸我不書

據傳襄二十六年齊取我高魚

必有歸

之者也然後書是故濟西田書取謹聞書取

秋邾子來朝楚子鄭人侵陳遂侵宋

書遂伐楚言志不在蔡也書遂侵宋言志不在陳也

說在僖四年

南北之勢於是始也後十五年而宋楚平後

五十年而晉趙武楚屈建同盟于宋諸夏之君分為

晉楚之從矣南北之勢於是始故謹書之也自是訖

春秋師再有事無言遂者矣言遂者非與國伐盟主

齊侯伐衛遂伐晉事在襄二十三年

則盟主伐與國也

晉士鞅侵鄭遂侵衛傳曰衛叛

晉也事在
定八年

晉趙盾帥師救陳

書救陳何楚由是始伯也於是楚救皆不書

據傳為賈救鄭

闕椒救鄭之類

宋公陳侯衛侯曹伯會晉師于榘林伐鄭

此晉趙盾以諸侯之師伐鄭則其曰宋公陳侯衛侯曹伯會伐鄭何大夫初用諸侯也靈公之世兵車之會自參以上貶人之於是黜趙盾以其用諸侯也春

秋不以大夫用諸侯故書曰晉趙盾帥師救陳宋公

陳侯衛侯曹伯會晉師于棐林伐鄭則不以大夫用

諸侯之辭也

公羊易為不言趙盾之師君不會大夫之辭也

冬晉趙穿帥師侵崇晉人宋人伐鄭

二年春王二月壬子宋華元帥師及鄭公子歸生帥師

戰于大棘宋師敗績

戰未有書大夫者於是書宋華元鄭公子歸生大夫

初主戰也自此戰皆書大夫戰不書大夫者吳也吳

無大夫也

獲宋華元

說在獲晉侯

秦師伐晉夏晉人宋人衛人陳人侵

鄭

此晉趙盾用諸侯之師曷為貶稱人以晉為甚不競

也楚方圖伯而晉以大夫用諸侯由是兵車之會自

參以上皆貶之而自柳棼之役楚皆稱子矣

九年

秋九月乙丑晉趙盾弑其君夷臯

三傳同

冬十月乙亥天

王崩

三年春王正月郊牛之口傷改卜牛牛死乃不郊猶三望葬匡王楚子伐陸渾之戎

窺周室也

夏楚人侵鄭秋赤狄侵齊宋師圍曹冬十月丙戌鄭伯蘭卒葬鄭穆公

四年春王正月公及齊侯平莒及邾莒人不肯公伐莒

取向

有穀
梁傳

秦伯稻卒夏六月乙酉鄭公子歸生弑其君夷

傳例說
在章指

首弑君者公子宋也則其蔽罪於歸生何歸生為正卿而宋有無君之心非歸生孰禁之於歸生乎謀先然而弗禁則賊由歸生而已矣是故歸生之弑公子宋啓之不以罪宋而罪歸生甯喜之弑公子鱄啓之不以罪鱄而罪甯喜董史書趙盾孔子取焉蓋有合於春秋

赤狄侵齊秋公如齊公至自齊冬楚子伐鄭

五年春公如齊夏公至自齊秋九月齊高固來逆叔姬

傳有

公自主之也於是公如齊高固使齊侯止公請叔姬

焉則高固伉也

從穀
梁傳

叔孫得臣卒冬齊高固及子叔姬來

凡來譏也非歸寧之辭

楚人伐鄭

六年春晉趙盾衛孫免侵陳

趙盾之罪嘗著於春秋其再見曷為無貶自宋萬而

下無討賊者則九人而已矣

夏四月秋八月螽冬十月

七年春衛侯使孫良夫來盟夏公會齊侯伐萊秋公至

自伐萊

傳例說在章指

大旱冬公會晉侯宋公衛侯鄭伯曹伯

于黑壤

有傳

晉靈公之會同皆不序自黑壤而下復序諸侯何也
垂隴之役初以大夫會盟自以大夫會盟而後不序
諸侯不序諸侯猶責伯者也終靈公之篇則諸侯無

貶矣以其不勝貶序之可也是故春秋自隱而下君
恒稱君貶人之故諸侯多貶辭焉自文而下大夫恒
稱大夫貶人之故大夫多貶辭焉諸侯不勝貶則政
在大夫矣大夫不勝貶則陪臣執國命矣

八年春公至自會夏六月公子遂如齊至黃乃復

有公羊傳

辛巳有事于太廟仲遂卒于垂

大夫卒恒稱名則其兼字之何自是仲氏世為卿故

譏之也

本劉氏

其不言公子仲遂蒙上文也大夫卒竟

內不地

據定五年季孫意如卒于房

竟外地

據成十七年公孫嬰齊卒于狸脰

壬午猶繹萬入去籥

有公羊傳

戊子夫人嬴氏薨晉師白狄

伐秦楚人滅舒蓼秋七月甲子日有食之既冬十月己

丑葬我小君敬嬴雨不克葬庚寅日中而克葬

穀梁城有傳

平陽楚師伐陳

九年春王正月公如齊公至自齊夏仲孫蔑如京師齊

侯伐萊秋取根牟

取言公

據四年伐莒取向以前皆言公

取不言公非公命也自宣而

下征伐在大夫矣

此年取根牟成六年取鄆襄十三年取郛皆微國也

八月滕子卒九月晉侯宋公衛侯鄭伯曹伯會于扈晉荀林父帥師伐陳辛酉晉侯黑臀卒于扈

諸侯卒雖不出竟地之

冬十月癸酉衛侯鄭卒宋人圍滕楚子伐鄭晉卻缺帥師救鄭

書救鄭何楚伯也元年救陳今年救鄭而辰陵之盟序陳鄭於楚子之下遂以諸侯予楚矣

陳殺其大夫洩冶

穀梁有傳

十年春公如齊公至自齊齊人歸我濟西田夏四月丙

辰日有食之己巳齊侯元卒齊崔氏出奔衛

傳例說在章指公羊

世卿非是

公如齊五月公至自齊癸巳陳夏徵舒弑其君平

國六月宋師伐滕公孫歸父如齊葬齊惠公晉人宋人衛人曹人伐鄭秋天王使王季子來聘

自頃王而下王室無聘魯者於是再聘而王季子實來則已尊矣

公孫歸父帥師伐邾取繹

取根牟不書師此其書歸父何伐邾猶公命也取繹

非公命也宣公而下征伐在大夫故自取繹凡取皆

不書其人

據昭元年傳季武子伐莒取鄆但書取

自伐杞凡伐皆不書

公

大水季孫行父如齊冬公孫歸父如齊齊侯使國佐來

聘饑楚子伐鄭

十有一年春王正月夏楚子陳侯鄭伯盟于辰陵

序楚子於陳侯鄭伯之上初子楚以伯也

公孫歸父會齊人伐莒秋晉侯會狄于欒函

此外會也曷為書之如吾君內之也楚方倡義於天下而晉孜孜於羣狄至往會焉晉卑甚矣是故楚莊王之春秋晉有諸侯之事不悉書也於宣三年晉侯伐鄭不書五年荀林父伐陳不書

冬十月楚人殺陳夏徵舒

楚亟稱子矣自宋萬而下無討賊者雖討之不以其

罪且百年於此則楚之討夏徵舒其不曰楚子何春秋之法惟討賊不以內外貴賤恒稱人是故殺大夫恒稱國或稱人殺他國之大夫恒稱人或稱君據昭四年殺慶封惟討賊訖春秋稱人以是為國人殺之也

丁亥楚子入陳

於是楚子為陳夏氏故伐陳謂陳人無動將討於少

西氏遂入陳殺夏徵舒則曷為不書入而后殺

據晉文先

書入曹後書執曹伯

予之以討賊之義也書入而后殺是以利

陳累莊王也不以利陳累莊王則討賊一事也入一事也入雖君將貶人之於是稱楚子楚強甚矣終莊王一篇雖圍滅無貶辭固進楚也亦憂楚也

納公孫寧儀行父于陳

凡奔非其罪納之者罪也則但書納公孫寧儀行父與君淫者也則其不書奔何微二子則楚師不出徵舒不討靈公不葬然則宜納者也則其書納何二子足以免於奔而已矣而納之者楚子之過也

十有二年春葬陳靈公楚子圍鄭夏六月乙卯晉荀林父帥師及楚子戰于邲晉師敗績

大夫嘗主戰矣猶未敵君也以大夫敵君於是始甚矣大夫強也鞏之戰不惟敵君且盟齊於師矣

秋七月冬十有二月戊寅楚子滅蕭晉人宋人衛人曹人同盟于清丘

有傳

此晉先穀宋華椒衛孔達也曷為貶稱人猶曰人自為盟也人自為盟自鹿上以來未之有也於是再見

其再見何中國久無伯也由救鄭之後大夫會伐自
參以上皆不書至是會盟亦不書矣

宋師伐陳衛人救陳

十有三年春齊師伐莒夏楚子伐宋秋螽冬晉殺其大
夫先穀

十有四年春衛殺其大夫孔達

清丘之盟晉以衛之救陳晉討焉孔達曰苟利社稷
請以我說於是自殺衛人以說於晉而告於諸侯稱

國以殺其君意也是故苟其君意雖孔達書殺苟非君意雖公子遂為宣公殺惠伯不書也

夏五月壬申曹伯壽卒晉侯伐鄭秋九月楚子圍宋葬曹文公冬公孫歸父會齊侯于穀

十有五年春公孫歸父會楚子于宋

吾大夫始特會楚也

夏五月宋人及楚人平

凡平不書必關於天下之故也而後書有與楚平者

矣於陳不書

文九年

於鄭不書

宣十年

至宋始書之宋嘗

及楚平矣

僖二十四年
宋及楚平

至莊王始書之必宋從楚必

莊王得宋天下將有南北之勢春秋特致意焉

六月癸卯晉師滅赤狄潞氏以潞子嬰兒歸

楚滅國書君將矣此其稱師何滅國之大夫猶貶也

是故荀林父滅潞氏不書隨會滅甲氏不書滅國以

其君歸皆稱爵如楚人滅弦弦子奔黃楚人滅頓以

頓子牂歸楚人滅胡以胡子豹歸第言奔者不名之

以歸者名之

秦人伐晉

此秦伯也

桓公

王札子殺召伯毛伯

穀梁有傳

兩下相殺雖王卿士不書

據傳昭十二年劉獻公殺甘悼公十八年毛得殺毛

伯過之類此何以書斥王之辭也於是王孫蘇與召氏毛

氏爭政使王子殺召戴公及毛伯衛王孫家人也而爭政王子一日而殺二卿則譏不但在其人也是故

終春秋纔一再書之王札子殺召伯毛伯陳侯之弟

招殺陳世子偃師皆斥君之辭也

傳云王子捷

秋螽仲孫蔑會齊高固于無婁初稅畝

三傳同從公羊

冬螽生

饑

有傳

十有六年春王正月晉人滅赤狄甲氏及留吁

此士會也於是獻狄俘晉侯請於王王以黻冕命士

會將中軍且為太傅則何以亦書人滅終不可以無

貶也

夏成周宣榭火

有傳穀梁周災不志非是

秋郊伯姬來歸冬大有年

十有七年春王正月庚子許男錫我卒丁未蔡侯申卒

夏葬許昭公葬蔡文公六月癸卯日有食之己未公會
晉侯衛侯曹伯邾子同盟于斷道

同盟至新城而再見斷道之後不曰同盟者寡矣

秋公至自會冬十有一月壬午公弟叔盱卒

公穀左氏母弟稱弟

取例不

公弟者何非見大夫也

本何休

非大夫不卒而卒叔盱

賢之也

本穀梁

賢之所以惡宣公也凡先君之子稱公

子有謂稱弟是故宋地辰兄弟也一篇之間譏稱宋公之弟辰無譏則從其恒稱為公子地陳公子招一人也譏稱陳侯之弟招無譏則從其恒稱為公子招故不弟稱弟不友稱弟不弟稱弟傳曰陳侯之弟招殺陳世子偃師罪在招也不友稱弟傳曰秦伯之弟鍼出奔晉罪秦伯也叔盱稱弟惡宣公也

十有八年春晉侯衛世子臧伐齊公伐杞

自是內不言君將征伐在大夫矣


夏四月秋七月邾人戕鄆子于鄆甲戌楚子旅卒

有公羊傳

公孫歸父如晉冬十月壬戌公薨于路寢歸父還自晉

有傳至笙遂奔齊

三傳同



陳氏春秋後傳